

Addenda ao Convenio entre a Consellería de Educación, Ciencia, Universidades e Formación Profesional e a Fundación Laboral de la Construcción para o recoñecemento da formación preventiva impartida nos centros públicos, dependentes desta consellería, para os efectos da obtención da tarxeta profesional da construción

Santiago de Compostela, 19 de febreiro de 2025.

REUNIDOS

Dunha parte, don Román Rodríguez González, conselleiro de Educación, Ciencia, Universidades e Formación Profesional da Xunta de Galicia, en representación desta consellería, e de conformidade coas atribucións conferidas no artigo 34.1 da Lei 1/1983, do 22 de febreiro, de normas reguladoras da Xunta e da súa Presidencia e nos Decretos 42/2024, do 14 de abril, polo que se establece a estrutura orgánica da Xunta de Galicia e 44/2024, do 14 de abril, polo que se nomean os titulares das consellerías da Xunta de Galicia.

Doutra, don Diego Vázquez Reino, presidente do Consello Territorial de Galicia da Fundación Laboral da Construción, por acordo tomado na reunión celebrada o día 28 de novembro de 2019 e recollido na acta nº 201 do Consello Territorial de Galicia da Fundación Laboral da Construción, polo que se nomea Presidente a don Diego Vázquez Reino, actuando como representante legal da mesma.

Interveñen en función dos seus respectivos cargos e no exercicio das facultades que para convir, en nome das entidades que representan, teñen conferidas.

EXPOÑEN

1. Que en data dezaioito de febreiro de dous mil vinte un asinouse un convenio entre a Consellería de Cultura, Educación e Universidade, actualmente Consellería de Educación, Ciencia, Universidades e Formación Profesional, de acordo co Decreto 42/2024, do 14 de abril, polo que se establece a estrutura orgánica da Xunta de Galicia, e a Fundación Laboral de la Construcción para o recoñecemento da formación preventiva impartida nos centros públicos, dependentes desta consellería, para os efectos da obtención da tarxeta profesional da construción.

2. Que a cláusula cuarta do referido convenio relativa á vixencia do mesmo establece que: O convenio entrará en vigor na data da súa sinatura e terá unha vixencia de catro anos, podendo prorrogarse por acordo das partes mediante a addenda correspondente. Esta addenda terá unha vixencia máxima de catro anos e asinarase antes da finalización do prazo de vixencia do convenio.

Non obstante, o convenio poderá denunciarse por calquera das partes; a denuncia deberá realizarse por escrito e con dous meses de antelación á data na que se queira poñer fin á relación entre as partes.

3. Que a Resolución do 6 de setembro de 2023, da Dirección Xeral de Traballo, publica o VII Convenio Xeral do Sector da Construción, (BOE núm. 228, do 23 de setembro), polo tanto debe adaptarse o texto do convenio á nova normativa.

4. Que ambas as partes están de acordo en que, unha vez expirado o prazo é necesario ampliar a vixencia do convenio mediante a sinatura da correspondente addenda; así como tamén procede adaptar o texto do convenio aos cambios normativos que afectan á estrutura orgánica da Xunta de Galicia e á publicación do VII Convenio Xeral do Sector da Construción, acontecementos que tiveron lugar durante o período de vixencia do mesmo.

En consecuencia, estes organismos acordan subscribir esta addenda en base ás seguintes

CLÁUSULAS

Primeira. Obxecto da addenda

A través desta addenda prorrógase a vixencia do convenio durante catro anos máis. Así mesmo, adaptase o texto do convenio aos cambios normativos introducidos durante o período de vixencia do mesmo.

Segunda. Adaptación á nova estrutura orgánica da consellería

As referencias feitas no convenio á Consellería de Cultura, Educación e Universidade enténdense feitas á Consellería de Educación, Ciencia, Universidades e Formación Profesional tras a aprobación dos Decretos 42/2024, do 14 de abril, polo que se establece a estrutura orgánica da Xunta de Galicia e 138/2024, do 20 de maio, polo que se establece a estrutura orgánica da Consellería de Educación, Ciencia, Universidades e Formación Profesional.

Terceira. Adaptación ao VII Convenio Xeral do Sector da Construción

Procede a modificación dos seguintes apartados do convenio:

1. Expoñen do convenio, o apartado 5. quedará redactado da seguinte forma:
 5. Que o VII Convenio Xeral do Sector da Construción no punto 2 do seu artigo 139, principios xerais, estipula que as accións e actuacións a realizar en relación cos contidos da Lei 31/1995, de 8 de novembro, de prevención de riscos laborais no sector da construción e a Lei 32/2006, de 18 de outubro, reguladora da subcontratación no sector da construción, teñen que ser análogas, homoxéneas e coordinadas en todo o territorio nacional. Á FLC correspóndelle ser o fío condutor dos principios e directrices a desenvolver nos programas formativos e contidos específicos de carácter sectorial e para os traballos de cada especialidade, a fin de que de forma equivalente se establezan os mesmos niveis de aplicación e cumprimento en cada un dos Consellos Territoriais. Así mesmo, no punto 1 do artigo 154 establécese que a Tarxeta Profesional da Construción (en adiante TPC) é o documento expedido pola FLC que constitúe unha forma de acreditar, entre outros datos, a formación específica recibida do sector polo traballador

en materia de prevención de riscos laborais, así como a categoría profesional do traballador e os períodos de ocupación nas distintas empresas nas que vaia exercendo a súa actividade.

2. A cláusula terceira do convenio quedará redactada da seguinte forma:

Terceira. Actuacións das partes

A colaboración que inspira o presente convenio, que non ten contido económico, farase efectiva mediante o desenvolvemento das accións consistentes en:

A Consellería de Educación, Ciencia, Universidades e Formación Profesional comprométese ao seguinte:

- A formación que se imparta nas especialidades relacionadas co sector da construción axustarase ás condicións establecidas no Libro II, Título 3 do VII Convenio Xeral do Sector da Construción.
- Os diplomas ou certificados de formación expedidos polo director ou directora do centro público que corresponda, de acordo co contido formativo que se imparta, farán referencia ao artigo que corresponda do mencionado Libro II e no Anexo XII do VII Convenio Xeral da Construción. Os diplomas ou certificados de formación poderanse expedir previamente ao acceso do alumnado á realización dos correspondentes períodos de formación en empresa u organismo equiparado.
- Co fin de que a formación impartida sexa válida para os efectos da TPC, a Dirección Xeral Formación Profesional incluírá nos diplomas ou certificados entregados o seguinte texto: "Formación recoñecida pola Fundación Laboral da Construción para os efectos da TPC, en virtude do convenio asinado o día de febreiro de 2025".

A FLC comprométese a:

- Admitir como válida a formación impartida polo centros educativos dependentes da Consellería de Educación, Ciencia, Universidades e Formación Profesional e recollida no Libro II e no Anexo XII do VII Convenio Xeral da Construción, e que poderá ser acreditada polo alumno ou alumna para os efectos do disposto no Libro II do VII Convenio Xeral do Sector da Construción respecto da obriga de formación en materia de prevención de riscos laborais e da TPC.

- Validar ao alumnado que realice os ciclos formativos da familia profesional "Edificación e obra civil" nos centros educativos dependentes da Consellería de Educación, Ciencia, Universidades e Formación Profesional, o cumprimento do requisito de experiencia establecido no artigo 157, punto 2 de VII Convenio Xeral da Construción para acceder á solicitude da TPC, dado que no transcurso de cada un dos ciclos formativos, os alumnos e as alumnas realizan o correspondente período de formación en empresa u organismo equiparado cunha duración superior a un mes.

Na difusión de todas as accións que se poñan en marcha para o desempeño do presente convenio (publicidade, comunicación, información, etc.) figurará, de forma expresa, o logotipo da Xunta de Galicia.

E en proba de conformidade co exposto, ambas as partes firman a presente addenda na data da súa sinatura dixital.

O conselleiro de Educación, Ciencia, Universidades e Formación Profesional

Román Rodríguez González

O presidente do Consello Territorial de Galicia da Fundación Laboral de la Construcción

Diego Vázquez Reino